

Bwana, hukupanda mbegu njema katika konde lako? Limepata wapi basi magugu? Akawaambia, Adui ndiye aliyetenda hivi—Mathayo 13:27, 28.

Hivyo kadiri inavyowezekana, kuanzia miaka yake ya awali, mtoto awekwe mahali kitabi hiki (asili) kinapoweza kuwa wazi kwake. Hebu na aitazame mandhari nzuri iliyochanganywa rangi na Msanifu Mkuu katika turubai la kuchorea la anga linalobadilikabadilika, hebu ayafahamu maajabu ya nchi na bahari, hebu ayatazame maajabu yanayofunuliwa ya majira yanayobadilika na katika kazi zake zote, amjue muumbaji

Hakuna njia ɓnyingine ambayo kwayo msingi wa elimu ya kweli waweza kuwekwa na kufanywa thabiti. Lakini hata mtoto anapokutana na viumbe asili, ataona mambo yatakayomkanganya. Atatambua kwa hakika utendaji wa nguvu za adui. Hapa ndipo viumbe asili huhitaji mfafanuzi. Kuona uovu dhahiri hata katika ulimwengu wa asili, kunatupatia somo la uchungu kujifunza. “Adui ndiye aliyetenda hivi” Mathayo 13:28.

Ni katika nuru inayoangaza kutoka Kalivari tu ambapo mafundisho ya viumbe asili yanaweza kueleweka kwa usahihi. Kupitia kisa cha Bethlehemu na msalaba hebu ioneshwe jinsi ilivyo vyema kuushinda uovu na jinsi ambavyo kila mbaraka unaotujia ni zawadi ya ukombozi.

Katika mbigili na michongoma, katika mbaruti na magugu, umewakilishwa uovu unaosababisha magonjwa na uharibifu, katika ndege waimbao, na maua yanayochanua katika mvua na mwangaza wa jua, katika upepo wa wakati wa joto na umande mtulivu, katika vitu elfu kumi vya asili, tangu mbuyu wa msituni hadi kwenye ua dogo linalochanua mizizini, huonekana upendo unaorejesha. Na bado viumbe asili hutufunulia wema wa Mungu.

Maana ninajua mawazo ninayowawazia ninyi, asema BWANA, ni mawazo ya amani wala si ya mabaya” Yeremia 29:11. Huu ndio ujumbe ambao katika mwanga utokao msalabani unaweza kusomwa kwenye mwonekano wote wa viumbe. Mbingu hutangaza utukufu Wake, na dunia imejazwa kwa utajiri Wake (*Elimu ya Kweli*, uk. 77, 78).

Adamu na Hawa pale Edeni walipopoteza mavazi ya utakatifu, walipoteza nuru ambayo ilikuwa ikiangazia asili. Hawakuweza tena kuelewa ipasavyo. Bali wale wanaopokea nuru ya uzima wa Yesu, viumbe asili vinaangazwa tena. Katika nuru ing’aa kutoka kwenye msalaba wa Yesu, tunaweza kufasiri ipasavyo mafundisho yatokanayo na viumbe asili.

Yeye aliye na ujuzi juu ya Mungu na Neno Lake anayo imani iliyotulia katika utukufu wa Mungu wa Maandiko Matakatifu. Haipimi Biblia kwa mawazo ya sayansi ya wanadamu. Huyapima mawazo haya kwa kiwango kisichokosea. Anajua kuwa Neno la Mungu ni ukweli na ukweli hauwezi kujipinga wenyewe.... Njia ya Mungu kama ilivyofunuliwa katika ulimwengu wa asili na katika kushughulika Kwake na mwanadamu anafanyiza hazina ambayo kwayo kila mwanafunzi katika shule ya Kristo anaweza kuchota (**Testimonies for the Church 8:324, 325**).